

四庫全書

集部

欽定四庫全書

集部

欽定本朝四書文卷十二

詳校官檢討_臣朱依吳

主事銜_臣徐以坤覆勘

總校官原任中允_臣王燕緒

校對官典簿_臣郭祚熾

謄錄監生_臣鄧友樞

欽定四庫全書

欽定本朝四書文卷十二目錄

孟子下之上

天下有道

三句

劉子壯

曾子養曾皙

二節

儲在文

有不虞之譽

一節

吳襄

智之實

二段

王庭

諫行言聽

二句

吳涵

博學而詳說之一節

戚藩

以善養人二句

俞長城

周公思兼三王一節

張玉書

王者之迹熄一章

李光地

王者之迹熄一章

韓菼

匡章通國皆稱不孝焉一章

王庭

詩曰永言孝思四句

韓菼

孔子曰唐虞禪一節

馬世俊

非其義也

四句

狄億

墨

一介不以與人

二句

熊伯龍

其自任以天下之重如此

熊伯龍

百里奚虞人也

二節

王汝驤

天下有道

三句

劉子壯

古者以道相治而天下咸明於辨矣夫小大不辨即德
賢亦不相服也而有道則皆以道使之此乃古之所云
役乎且觀聖世者正其綱紀必先明其道器蓋名分無
定以道予之則相安事權代乘以道居之則各正此其
義必總於一人而其勢全乎天下其惟天下有道乎天
下者有天下之一人也神聖應時則名號自命矣昊天
其子能代天者斯曰官焉制罷命爵皆天性之所名天

下者統天下之萬姓也愚賤安心則豪傑無名矣分民而土凡有功者皆曰君焉胙地錫姓各才分之所至我想其時殆小德役大德小賢役大賢乎德者不止就其人言之也又兼先世言之其在天子則義農以來以五行為德相乘而王堯舜而降以五官為德相代而興至於諸侯亦能奮聖人之蹟而當一王之初天下有道之時也則必使之居其地以治其祀不以其無所積累而忘其先而其中擇其人之有德焉又差其先之所為德

焉又序其德之近於時代焉而以為小大天子統其上
而或二伯或三恪自五等而及於附庸通之朝聘納其
貢賦以是為役焉已矣賢者不止就其德言之也兼就
其功言之其在王者則衣食未開以養民為賢天子相
讓水火既亟以救民為賢諸侯相推至於將相皆能應
名世之數而當一王之起天下有道之時也則必使之
胙其茅以報其勛不以其無所憑藉而忘其勞而其中
先其佐命之賢焉又次其明道之賢焉又錄其賢之棄

於勝國焉而以為小大王者作其極而或三公或九卿
自六官以逮於輿隸內以御外長以率屬以是為役焉
已矣於是知有道之時之至公也瞽瞍以前皆皇裔而
越在畎畝朱均相繼皆帝子而讓於匹夫至於不才之
子有四雖為蠻夷之長而不使居聖人之中國焉德賢
不足也使小大少有所私則唐虞之天下舜禹且不能
爭又安能雍容而分岳牧哉又於是知有道之時之甚
嚴也貴貴為驕天下之漸而武猶以尚父下拜親親為

私天下之始而周猶以五叔無官至於內官之品有九
皆匹外官之制而有以分陰陽之正位焉德賢無不在
也使小大少有所混即天下中之一家文武且不能理
又安能均平而班爵祿哉所以上世高士抱其微節嘗
有恥為天子之事而後世聖人得其大道遂為直接帝
王之傳雖其事不足述與其時有不同然皆有崇德尚
賢之義焉嗚呼邈矣

別白賢德即先儒有未說到處多讀書以廣其識自

可鎔經義而鑄偉詞

原評

議論透闢理亦平正前半行文更合紀律則有大醇而無小疵矣

曾子養曾皙

二節

儲在文

大賢之養志事親之則也夫養者事親所同而養志與養口體則有間矣必如曾子而可且人幸有親而事之俾親有幾微不遂之心皆子之咎也善事親者相遇於神明之交固與貌奉者殊科而得乎人心之所不言而同然也守身以事親吾於古得一人焉曰曾子彼其省身敦行無忝所生者茲不具論論其軼事當日者曾皙在堂日具酒肉以進出入視膳無異常人而將徹必請

分甘顧問未嘗告匱波及童穉佐色笑焉曾皙顧而樂之怡然忘老人不誦其子之賢而歎羨其父之樂也乃至曾元而此風一變矣有酒在尊有肉在俎胡不聞所請也每食無餘亡何而又以進也一戶之內數十年之間人事變遷遂成今昔此即口體所欲無缺於供特吾親一日之飽耳其他又何問乎而曾子深遠矣高年之心不堪多用使事事待於記憶而已患其勞意未起而早迎之則其神較恬而曠達之懷脫然其無累垂暮之

氣幸其弗衰使稍稍拂厥性情而大懼其鬱心甫動而曲成之則其天日暢而侗儻之槩至老而益新事親若此真所謂養志者矣嗟乎人盡人子也彼尊養之至既不可以語尋常即顯揚之文亦慮無以勝時命惟此家庭之近晨夕之常奉言笑於遵豆之旁而窺意旨於几杖之下所謂進以愉薦以欲者此也所謂視無形聽無聲者此也必如是始足以為人不如是不可以為子君子觀於曾氏三世之間而知事親之則不在彼而在此

也且曾子養志尤在守身不虧不辱全受全歸且以傳
於其徒而區區酒食之節又竭情盡慎如此故語純孝
者必歸焉此百世之則也

筆致蕭疎自適中二比可歌可詠一從必請所與一
從必曰有兩句內著想經有筆人道來便爾意味深
厚

有不虞之譽

一節

吳 襄

大賢甚言毀譽而重慨其有焉夫使直道猶存雖無毀譽可也況不虞之譽求全之毀而又可有之也哉且自三代之直之不槩見於天下而毀譽二者遂為人情之必不能無吾昔已傷之乃今而知但言有譽而已而猶未為奇也夫世即有譽人者而或為所譽者早已逆料其將然一旦而譽及之是則其人猶有可揚之處而特揚之或溢其美焉耳然君子猶以為非緇衣之好者凡

以其為譽也而不謂更有濫乎其為譽者也仁聖賢人之名無端取以相奉而夫人之始聞其譽已也猶疑其非譽已也既而知其果譽已矣自以為念不到此雖使譽人者設身以處而亦知其念不到此也然卒譽焉者非無說也今夫以物與人雖其甚重而受之不甚感者本其所當得也必於其不當得者與之斯大喜過望圖報之不遑矣濫乎譽者之欲結乎其人之私也亦若是焉是則不虞之譽而已矣譽而有此而豈復可信也哉而

吾向者猶妄意天下之無譽也抑又知但言有毀而已而猶未足異也夫世即有毀人者而或為所毀者不能預防之平日一旦而毀叢之是則其人尚有可訾之迹而或訾之稍過其分焉耳然君子猶以為非巷伯之惡者凡以其為毀也而不意更有刻乎其為毀者也醜德敗類之事忽然取以相詆而夫人之始聞其毀已也不知其何以毀已也既而詳審其所毀者焉自以為庶幾免此雖毀人者平心而論而亦知其實能免此也然卒

毀焉者誠何心也今夫以我攻人雖其甚暴而聞風不
甚懼者謂已固有備也即於其有備者攻之斯相顧驚
疑無一震懾者矣刻乎毀者之欲使人畏己之口也亦
若是焉是則求全之毀而已矣毀而有此而又安所底
止也哉而吾向者猶妄意天下之無毀也

意義俱從兩有字生出翻覆頓折清空澹宕亦用間
出奇之法

智之實

二段

王庭

推於智禮之實非二者莫與也夫智不知之乎禮不節文之乎要之二者其實也豈別有知之節文之者乎且夫人有四德唯元長之理一而不二也至其分殊則又不啻二也雖然人之孝其親而悌從焉愛其人而敬寓焉則仁與義兼出其間矣有與類舉也有與並行也雖然盡之矣不可以有加也今即所云智禮者言之乎夫人之貴於能智不貴於不智者以智為詳盡事理也今

有人焉於凡事理之差殊亦既詳且盡矣可不謂智乎而不詳盡於吾親吾兄又可謂智乎是非不智也獨不智於智之所從本獨不智於智之所從始則非智之實也何者智之實知斯二者弗去是也吾有親而知所當事且知其不可不事也吾有兄而知所當從且知其不可不從也家庭之間至淺近焉爾然而以性則深以治則大必知始弗去焉不可強也迨於知之而得吾親吾兄之所當事且從者則即得非吾親非吾兄之所當推

於事且從者身名君友之故推此而詳性命神明之微亦推此而著也蓋智之極於高深者多矣恐高深之智易托也人事之知實焉爾人事之知則又以不慮而良知者實焉爾人盡云智也亦知斯二者之為智哉且人之貴於有禮不貴於無禮者以禮為悉備經曲也今有人焉於凡經曲之紛紜亦既悉且備矣可不謂禮乎而不悉備於吾親吾兄又可為禮乎是非無禮也獨無禮於禮之所從本獨無禮於禮之所從始則非禮之實也

何者禮之實節文斯二者是也吾事親而節文其所以
事未嘗徑情而直行也吾從兄而節文其所以從未嘗
徑情而直行也家庭之間無忌諱焉爾然而過情則褻
過理則離有節斯稱文焉不可苟也迨於節文而得吾
親吾兄之所以事且從者則即得非吾親非吾兄之所
以倣於事且從者拜跪坐立之數倣此而嚴冠婚郊社
之儀亦倣此而極也蓋禮之著於經制者溥矣恐經制
之能易飾也人倫之能實焉爾人倫之能則又以不學

而良能者實焉爾人盡云禮也亦知斯二者之為禮哉
此更可進言樂矣

層折曲暢雖無精深之義筆致夭矯空靈可為庸腐
板重藥石

--	--	--	--	--	--	--	--	--

諫行言聽

二句

吳涵

念舊君者不忘其舊事焉夫昔之日而諫行而言聽而膏澤逮民此舊事耳奈何思之不忘哉告齊宣曰王鯁鯁然以舊君為問得毋疑臣之言實過而獨思臣之事君也將惟富貴之榮寵之而遂可畢臣之願乎抑必明良一德大展其生平之所學使其君民之不忘其臣者一如其臣之不忘其君之為得也然則臣所致望於其君者從可知矣當立朝之始而有惓惓不忍釋者王聞

之乎然則臣所難已於其君者誠有在矣即筮仕之時而有隱隱莫能必者王思之乎蓋必諫行言聽膏澤下於民也計其臣之始終而論其諫其言亦第得之偶爾之遭逢吾一身之莫必而獨此諍直之風留千古哉乃有所未可忽置者非徒諫也諫行矣非徒言也言聽矣夫廣廈細旃之上動色而相規正容而入告者翳豈盡無良也乃獨其臣之有俞而靡咈焉夫轉圜之美哲王之道固然而臣顧何幸而躬邁之且就其臣之踪跡而

觀其國之民亦第見之一時之臨泣吾進退之無常而獨此惠愛之思在閭里哉乃有所不能遽泯者諫之既行而膏澤下矣言之既聽而膏澤又下矣夫蓬樞繩牖之間情深於望歲而誼切於戴天者翳豈盡無知也乃獨其臣之為父而為母焉雖撫字之仁我后之道應爾而臣顧何脩而身見之夫勒其奏牘自為一書考其謨猷已成往事君若曰已矣此固子大夫留遺至今日者也而臣則曰微君之故胡為留遺至今日也抑望其恩

施比之陰雨紀其遺愛載在甘棠民若曰已矣此固吾
大夫俎豆於不祧者也而臣則曰微君之故胡為俎豆
於不祧也大抵人情所最感念者多在坦然共信之懷
而一生所最經心者尤在赫然可紀之績若此君忘其
亢臣獻其誠上殫其心下蒙其惠凡在備官者度其所
願不過如是而已而況有進於是者乎此臣所瞻顧徘徊而不能已於其君者也

處處是去國後追憶神情故無一致君澤民通套語

徘徊指點情緒亦復深長

博學而詳說之

一節

戚藩

說有詳而得所反則學猶不可據也夫學而博焉能遂約乎詳說之則將反矣所以一說而異用歟且理之存乎說之前者甚深而不可據也則必謀夫理之寓於精言者以要之然而急求其精究至獲粗而止蓋不能使理之曲折著於吾心雖攬其大畧適得其末事已耳夫學者以約期約而未有反也孤陋者其情多岐偶見其一而若可守更閱其一而又可遷矣夫惟極聞識於周

通則指歸不惑也是故事有相反而乃以相效即以博期約而未有反也好古者其奇難棄恃其所信而以為安將蓄其所疑而亦以為富矣夫惟衷同異於羣言則大要立舉也是故功有相盡而乃以相足則博學而又詳說之之為說約乎驅天下中下之資迫與說要渺之理鮮不以為素不相識之物斯難之矣廣之耳目之途質雖愚陋不容不悉心於其間此時周咨極辨幾於雜泛而難稽然習之而知其數又習之而明其義將百言

之意可以一言盡也抑天下才識之流強為說易簡之
撰彼又以為畧而易盡之事斯忽之矣縱之文藝之中
雖有聰明不能不委折以相赴此時優游漸積疑於迂
濶而不情乃乍閱之而得其粗久閱之而得其精將多
言之旨可以無言槩也然則絕學孤鳴其說於天下將
何所反乎要以人之說詳之其說自可深也苟為已說
所未及即芻蕘採詢亦自通至精至神之極而實無有
人之說者存也存吾說焉已耳百家爭以其說相高尚

又將何所反乎要以吾之說詳之其說盡可廢也苟屬
吾說所力求雖三代六經亦自有可革可刪之法則亦
無有吾之說者存也存吾說之理已耳由前之說可無
讀古之誣由後之說可無窮大之弊則博約為相救之
功然始之說亦可不論不議而終之說亦可生變生文
則博約為相兼之用要人之能說約者蓋難之矣

价人為文心思極苦往往不能自達其說其刻入處
雖多名雋語而通身詞章不復能陶鍊雅潔惟此篇

最為開爽明晰

以善養人

二句

俞長城

公善於人不期服而自服也夫善者人所公也而徒以服人乎以養為服天下所由歸耳嘗觀古之盛王其所挾以正天下者若無異於霸者之所為而特其至誠惻怛之懷若不欲急白於天下而天下卒如吾意以相應蓋德莫厚焉化莫隆焉彼以善服人者不能服人何有於天下哉上天立民牧原非厚於元子而薄於庶邦道德仁義厥賦惟均奉而體之裕如已先王建萬國原使

有相輔之情而非有相角之勢學校井田其法可考率而行之秩如已故善者所不敢私而服者所不忍言庶幾以養人乎接壤而居者非其同姓宗盟則皆甥舅之國也思我邦家利則相周害則相恤惟爾友邦是賴而忍以勢御與故一夫不獲王者恥焉明告以君國子民之道而默示以同好棄惡之思使天下翻然悔悟斯已矣列土而封者非其親賢世胄則皆神明之後也思厥祖父功在天地名在河山今其子孫勿率而忍以威震

與故一方未靖王者憂焉感動乎至情至性之隱而式
憑乎先王先公之靈使天下煥然更新斯已矣時而天
下未服王者不急也或則脩德或則脩意或則脩文勿
先時以圖利勿後時以除殘其所以拯疾苦者一如飢
渴之懷焉而筐篚壺漿誰不見休乎及於天下已服王
者不矜也漸之以仁摩之以義節之以禮勸之惟恐拂
其情董之惟恐形其過其所以敷德意者一如顧復之
勞焉而南朔東西誰不徧德乎蓋其始也天下之不善

責在王者養之之心至深也而其繼也天下之善皆歸王者服之之勢至遠也而猥云服人乎哉

一養字中具有天德王道須此愷惻沉摯正大光明
乃見王者氣象

周公思兼三王

一節

張玉書

以相道兼列聖而得其無逸之心焉夫周公與三王事異而心同也思而得得而施誠存之之君子哉今夫前聖後聖相師於異日而不能相聚於一時此亦天之所無如何也而聖人之憂勤惕厲由此起矣歷觀古之君子自三王以後有臣道繼君道之終相業總王業之盛者其周公乎周公統承重任輔翼沖人所履非三王之位所遇非三王之時而所治猶然三王之天下也於是

公之心迫而為思焉綜詩書而論治其人已往而其事
猶新是即三王與我遇矣我欲告無罪於天下必告無
罪於先人既告無罪於先人必告無罪於夏商之祖蓋
少缺焉而公心憾也登明堂而懷古其德配天而其事
垂後是即三王至今存矣今日使天下見吾君之事必
使天下如見先君之事既使天下見先君之事必使天
下如見禹湯之事蓋缺一焉而公心憂也以公之才濟
公之思兼施四事夫復何慮哉雖然事非一槩論也我

觀文考作豐公治東陝寧王歸鎬公治西京即公之一
身而鎬京之治不盡合於豐豐京之治不盡合於鎬又
況由周遡商維有歷年由商遡夏維有歷年天運代更
人事互異強而合之此必不得之勢也而謂公能已於
思乎未嘗思之而事事皆可疑思之而疑者必求其一
是患伏於隱微憂生於燕笑三王處此度有必欲盡之
圖維則孫子之謀安得辭其瘁也疊疊於百為未動之
先而惟恐疎虞以貽後悔推是心也不有焦勞中夜者

哉如是而公不以得為幸乎未嘗得之而事事不敢安得之而安者又必急於一試禮樂休養於百年家室綢繆在一日三王處此度有迫欲赴之成勞則創建之謨何可晏然俟也汲汲於同事不知之地而惟恐遲豫以重流言推是心也不有宵衣待旦者哉乃知聖人之事勢各殊雖一家具有通變聖人之心傳則一雖異代亦可同揆觀周公之存心後之君子可以興矣

如題安頓不求異人而人自不能及

王者之迹熄

一章

李光地

作經以寓王法聖人之得統者然也蓋王者治天下之法存於詩故迹熄而詩亡矣孔子取其義而以春秋繼之此可見其得統於文武周公而文在茲乎孟子意謂帝王之道莫備於仲尼刪述之功莫盛於春秋何則王迹之未熄也諸侯述職於王則有燕饗諷詩而勸戒之義著王者巡守列國則因陳詩貢俗而黜陟之義行及其後也共主大號雖存而迹熄矣變風變雅雖具而詩亡

矣孔子生於周末傷王道之久廢故作春秋而始東遷
其殆繼詩而存王迹者乎何則春秋孔子因魯史舊文
而修者也列國之史晉有乘焉取其備國家之記載楚
有檇杙焉取其誅奸諛於既死魯有春秋則又因天道
以紀人事焉三者之書一也所有則齊晉代興會盟樓
伐之事而已非有王者之迹也所垂則列國史官掌記
時事之文而已非若詩之為經也然則春秋之作何所
取乎孔子嘗曰其義則丘竊取之矣蓋王者於諸侯有

勸戒焉義之所在也彤弓湛露不可作矣孔子則借王者之法以示勸戒此其大義之炳如日星者乎王者於諸侯有黜陟焉義之所在也太師風謠不可問矣孔子則假南面之權以明黜陟此其分義之嚴於斧鉞者乎定桓文之功罪則事雖霸而實王秉聖心之筆削則文雖史而實經矣迹熄而未熄詩亡而不亡以一時之義而維萬世列聖之道不有孔子人之異於禽獸者誠幾希哉

詩兼風雅理始完備蓋雅詩具勸懲之義風詩是王者命太師採陳而行賞罰之典於春秋所取之義為尤切也其義其字亦非指詩亦非指春秋懸空對上兩其字說下是謂春秋中所有之義也畢竟此義從何處取來夫子雖未明言隱然是正王道明大法從周公典法得來此春秋所以繼詩而存王迹也

自記

王者之迹熄

一章

韓 茨

史以繼詩義起於王迹也夫詩無有言及王迹者則亡矣非孔子春秋之作孰明大義於天下乎周之受命也文武始之周公成之其心已有憂而其思益以勤矣亡何而俱往存者其迹也然尚可緣是以考而羣奉一王之尊其迹也其義也此其義吾蓋於詩得之雅詩所載歌咏二后之成功與夫成康之治迹彬彬可觀也自厲之衰宣甫興之而又重之以幽亦甚矣獨至平而更甚

焉君子以為平之不能為宣也不特亡宣之詩并亡幽之詩何也幽之詩刺議怨誹猶與王者相責也而平之詩止自道其感遇之無聊泣嗟之何及若曰已矣無為復望矣故君子以為迹熄而詩亡嗟乎詩曷嘗亡哉其義亡焉爾孔子刪詩至此於風雅升降之際有微旨焉而吾因竊窺春秋之作以此蓋天下不可一日而無王人心不可一日而無義獨平之世數十年間其各自絕於王者不獨野人女子也即以大雅之舊人如家父凡

伯亦云老矣而曩者南山與板之詩何為今不作也豈
非不復思治之甚而其後將安所終也與故曰春秋之
作以此也雖然春秋非孔氏之書也其書與乘檣杙等
而事取諸齊晉文取諸史何作乎爾曰其義在則作乎
爾且夫天之下有權焉君與史而已義各有取也然而
楚取之則僭齊晉取之則假南董史克倚相諸人取之
則散不有君子其能作乎雖然作之矣何竊乎爾曰其
義在則猶竊乎爾義則王者之義也取則匹夫之取也

竊也是故桓文竊也等而上之共和竊也推而極之即周公亦竊也孔子之言其周公之思也與雖然春秋作矣而孔子終有所甚望乎其詩也是故序王風以丘麻終甚其亡也序列國風以下泉終冀其不亡也然未幾而鉏商以獲麟告矣則又歎王者之不作而迹終不可復覩也於是乎春秋亦亡

纏綿悱惻則詩人之優柔騷人之清深也抑揚起伏則公羊之宕逸廬陵之婉折也惟詩與春秋交關處

及春秋繼詩以存王迹處尚未曾十分透徹

--	--	--	--	--	--	--	--

匡章通國皆稱不孝焉

一章 王庭

原章子之心未可以不孝罪也夫以責善故得罪得罪之心可原也謂章子孝不可謂不孝則又過矣亦曰是之為章子爾且論人者不推諸其心其人不可得而定也論心者不推諸萬不獲已之心其心不可得而白也苟當事之變而竟以常處之此世俗人之所能仁人孝子有所不能也當事之變而因以變行之又仁人君子之所不忍居然或猶愈於不居也知是者可與論章子

矣夫通國之不孝章子者就當日觀之以為失養於父而不知先當日觀之早無所致養於母父與母等孝也使必欲抱痛以全於母則既無以處父使必欲曲意以遇於父則又何以處母而究也卒同於陷父故章子之廢養非世俗五者倫也正章子之責善也且章子特以責善而不相遇故不得近非甘為決絕而遂以廢養者也蓋章子之心幾自苦不為全人故章子之行獨自甘暴其罪狀其母不為父也妻者其妻亦不為章子也妻

矣非以謝母也萬一九原有知而益觸怨於流離之感則章子之心愈痛也然而不自已也其身不為父也子者其子亦不為章子也子矣非以謝父也萬一天性不回而重激怒於屏出之舉則章子之心愈痛也然而不自已也其設心以為若是是不得為罪之小者苟不若是是并甚其罪之大者論章子於是孝不孝俱不足以概之亦云是之為章子也已矣究而論之章子之責善是乎曰父子責善賊恩之大也然而章子之責善非乎

夫責善朋友之道也朋友猶有所不容已而獨忍於不善其親親之過大而不怨是愈疏也故君子於此深悲章子之遇之不幸也若章子之設心則雖仁人孝子不是過也

下筆甚婉淡語都有深情連作數折鉤出末句言盡而意不止

原評

設心二語孟子之觀過知仁也作者曲曲從此洗發分外淒警亦不畧責善二節布置尤為得當

詩曰永言孝思

四句

韓 炎

原孝於思為尊養通一則也夫必以尊養之至者為則
幾無孝子矣惟思故可則也知此者可與說下武之詩
且君臣父子之間聖賢往往不徒論事而必原心千古
無臣父之人而窮不孝之所至時有類於臣父之為何
也惡其意也千古不皆尊養之至之人而窮孝子之所
至必欲以此為法以自窮何也亦善其意也則吾有以
論舜之孝矣上古即多神聖而孝之極至舜而始開然

舜自以孝而得天下不以天下而得孝也則當未尊未
養之時舜已居然一孝子矣孝子恒歷艱難而孝之途
至舜而終順然天欲以天下解舜之憂舜不以此自解
其憂也則當既尊既養之時舜亦別有所以為孝子矣
下武之詩之美武王者有曰永言孝思孝思維則至哉
思乎吾嘗以此詩通之於舜而知兩聖人之心固各有
所歎而亦各有所白也何也文祖受終而後賡以春秋
無恙之身猶得極家人之樂而武顧何如也念九齡之既

哀僅以俟服終而今日撫有天下已不及享人子一日之奉則以武視舜有愀然傷心者而君子謂武孝即舜孝也在天陟降之容亦無異旦暮溫清之事則仍然一思之所際而已矣皇王繼序以來文以燕天昌後之身已得進明堂之享而舜顧何如也陟南郊而議配必以聖人從而今日即坐享隆貴已無以為吾親身後之榮則以舜視武有愴然飲泣者而君子謂舜孝即武孝也盛德百世之祀且更饗胡公元女之封則亦仍然一思

之不匱而已矣凡事有則而思無則今必謂孝子之事
有成迹可尋則至性不出然千古履憂患之孝子多思
而席豐盛之孝子亦多思孝不同而思同也若一轍焉
耳凡事可言而孝難言今必謂孝子之心足歌咏自將
則中情亦淺然千古思之悱惻者彌質而思之流連者
亦彌文不可言而可言也若告語焉耳至哉思乎吾以
謂武者謂舜矣通於思之故即與子讀北山之詩感王
事之勞而常負將母之痛亦何莫非此思也又試與子

讀雲漢之詩慨周餘之民而忽念先祖之摧亦何莫非此思也

虞周相形已成町畦而英思辯才皆前人意義所漏為是題一開生面

原評

孔子曰唐虞禪

一節

馬世俊

禪繼皆原於天可援聖言以斷焉夫禪與繼殊斷之以
天而無不一也有孔子之言而此義固較然矣嘗謂仲
尼不有天下而天下之氣運皆自仲尼而論定之春秋
之際盛衰之故紛如孔子為之黜功以伸德抑人以尊天
而獨申大義於天下曰唐虞尚矣嗣此而夏后殷周大
統三建其為禪為繼豈非天哉中古無為其任天下也
易其讓天下也亦易乃弼服建師至夏后而法始備則

以夏后之法為法者知天物不可以屢更二帝揖遜無
留天下之迹亦無去天下之迹乃創淫懲傲至夏后而
心愈危則以夏后之心為心者知神器不容以輕授則
禪與繼之必不能同者皆有義行其間矣如別其義而
言之不獨禪與繼異即禪與禪亦異何也師錫創聞於
側陋奮庸考績於司空不一也如別其義而言之不獨
繼與禪異即繼與繼亦異何也孝孫復辟於徂桐沖人
委裘於負扆不一也自我而論則不然歷數在側陋而

羣聖相揖於同時若既以一朝而兼帝王之運則鼎社之建雖繼之數百祀而不復疑其私擁也唐虞無私之意夏后殷周之祖皆親見之雖謂禹以禪湯湯以禪武也將無同肩子非囂訟則嗣統寧異於敬承乃復歷二代而分官家之局則本支之寄雖繼之億萬世而不復憂其可變也唐虞不變之道夏后殷周之世皆遞承之雖謂湯以禪甲武以禪誦也將無同然則唐虞以先無繼乎曰有之五德遞勝何莫非神明之胄乃當其賢則

顓頊可嗣軒轅之統當其不賢則帝摯不可續高辛之祀唐虞擇人而畀亦猶行古之道耳豈夏后而獨有道更世改之嫌然則殷周以后無禪乎曰有之百世難知或更有非常之舉乃繼非其人則天命未改猶有守府之思禪非其人則物望所憑遂有篡竊之事唐虞疇咨而命早已立後之防矣豈夏后而獨無亂紀墜宗之懼嗚呼舜禹何必不固辭朱均何獨無德讓而禪者終禪矣阿衡叔父何必不久於七年徂宅貽詩何必發祥於

四日而繼者終繼矣豈非天哉豈非天哉

夏殷周同於唐虞之禪孔子泛論之詞也孟子引之
則側重夏之繼與唐虞之禪等耳文步步顧定章脈
妙義環生運用皆極飛騰之勢

非其義也

四句

狄億

墨

元聖之嚴於道義雖小而不敢忽也夫莫小於一介而道義存焉取與可毋嚴耶伊尹之樂道蓋至此而彌堅矣且吾甚怪夫世之疑聖賢者過也彼聖賢之所以自持者必極之至纖至悉而未嘗偶弛夫豈逆計後人之訾議而預絕其端乎蓋謹小慎微之學誠有不如是不敢安者此意惟在聖人乃倍加惕也伊尹於非義非道之大既能致嚴若此豪傑慷慨之士功名所係必爭之

若事屬尋常則以為非功名之所係也而往往當之有
慚德焉矯情飾節之倫聲譽所在必趨之若事屬微渺
則以為非聲譽之所在也而往往處之有遺行焉尹則
不然蓋雖極之一介之與一介之取而必不敢自蹈於
非義非道矣如第曰一介之失必將積微成鉅則其所
以衡道義者猶粗尹非謂積焉者之可以無憂而謂可
憂之正無俟於積也苟其以一介而忽之則即此已昧
在物之理即此已乖處事之宜縱後日悔而改圖而目

前不多此一失乎則尹之兢兢於道義也精矣如第曰
一介之失必將充類至盡則其所以辨非義非道者猶
疎尹非謂充焉者之可以無譏而謂可譏之正無待於
充也苟其以一介而違之則即此已不能盡乎天命之公
即此已不能全乎人心之制縱君子不復苛求而吾心
其遂能自解乎則尹之凜凜於非義非道也密矣而吾
乃知尹之有定見也自人之所見較量於大小之間而
忽乎其小一旦投之以大識未有不為之亂者尹惟視

一介如天下千駟故能視天下千駟如一介也而哲人知幾之全學可於一介之不苟見之而吾乃知尹之有定守也夫人之所守區別於巨細之交而畧乎其細一旦任之以巨力未有不為之靡者尹惟以處天下千駟者處一介故能以處一介者處天下千駟也而志士勵行之全體又可於一介之必嚴信之嗟夫尹之樂道若此而顧疑其不自重惜以貽後世之口實也豈可信耶見解透筆力超看其軒豁醒露幾忘其義理之深厚

於前輩中極近錢紹文

一介不以與人

二句

熊伯龍

取與之際雖聖人不敢忽也夫尚論伊尹未有及其守
之嚴者由不與不取觀之士豈不重小節哉且自論聖
人者舉其大體而畧其細行於是學道之士不以謹嚴
為先務而後世之議由此而興不知事有鉅細道無精
粗從古聖人未嘗不謹小慎微以明其志者也尹之弗
顧弗視豈徒立其大乎一介取與之間可見矣天下惟
事物未交之際聖賢雖有刻苦之意而人不知一介至

微而或以為與或以為取則精氣之先見也天下惟往來不及之地聖賢雖有砥礪之能而無所可用取與亦至微而由我以與由我以取則省察之易周也尹豈以一介之非道義而姑與之而姑取之哉人必自忘其廉恥而後謂他人之廉恥不足惜與者無幾悔悟之餘遂令無以自處非所以成物也惟道與義可以服人留一物而羞惡辭讓之良留於人心者無盡雖欲與之而有所不能矣人必未忘乎私利而後以偶居之私利為無

損取者無幾曖昧之動事已入於苟且非所以成己也
惟道與義可以定分謝一物而歆羨畔援之累謝於夢
寐者無窮雖欲取之而有所不敢矣學問有一介之未
辨其是非不可為精施受往來凡民以為日用而聖人
思慮焉蓋能審一介而後能審萬事萬物之理也名節
有一介之未底乎正大不可為一簞食豆羹羣情以為
生死而聖人淡漠焉蓋能處一介而後能處千世萬世
之變也嗟乎不與人一介而與人以身不取一介而取

人之天下此則尹之可以為權而淺者遂謂其有功名之意矣

他人將一介推廣言之以盡其蘊不若就一介推勘更見精微也文之得解處在此中股人必自忘其廉恥而後謂他人之廉恥不足惜此種名理從來未經人道末幅精力少懈

其自任以天下之重如此

熊伯龍

元聖身任天下可以觀其志矣夫世之苟且功名者皆無志天下者也惟尹重天下惟尹重身哉嘗謂天下將治必有匡濟之人匡濟之人將出必有自立之志蓋士不素蓄不足以重國道不專屬不可以成功是惟伊尹為足法命知覺者天矣然吾不知天之果知有尹否也天不必知有尹而尹知有天是以造化之氣機一人藏之待知覺者民矣然吾不知民之果知有尹否也民不

必知有尹而尹知有民是以萬物之性情一人主之非
任天下之重者能如此乎非自任者又能如此乎有深
居一室而謂之為人者意主於為人也有經營當世而
謂之為已者意主於為已也尹惟見一已之責必以天
下終而天下之責遂不得不自一已始世無聖賢任之
以成吾能世有聖賢任之以盡吾分如此則可謂為已
者與有英雄之略欲其無意天下無意則能養其才有
聖人之度欲其有意天下有意則能行其道尹惟見吾

學之大小必以天下為驗而天下之治亂遂不得不與
吾學相關我不任而人任懼性天之憾不釋我不任而
人亦不任懼千古之患無已如此則可謂有意者與天
下之人皆能任天下而弗知任者嗜欲蔽之也想彼自先覺
以來志氣清明矣天人上下相告於隱微先一日而覺
即先一日而憂上有君相旁有師友此際俱無藉手之
處天下之人皆欲任天下而弗克任者非議惑之也想
彼自先覺以來願力強固矣帝典民彝相係於性命我

所覺者非人之所喻則我所任者亦非人之所知前有
千古後有萬年此際實具危微之幾知其自任之重而
前此者可知知覺之辨志固不在小也知其自任之重
而後此者可知非常之原意亦不得已也蓋伐夏自此
始矣

將任天下歸入己之性分願力則自字精髓自出矣
規模氣象無不與阿衡身分相稱是謂詞足以指實

百里奚虞人也

二節

王汝驤

詳古人之本末可以知其所不為矣甚矣奚之被誣也
其為虞人為秦相本末彰彰如是不可為之辨乎且夫
自鬻要君之說汙甚矣不知其汙而為之則不智知其
汙而且為之則不賢若而人者其生平本末蓋亦不足
問矣而或以加之百里奚夫百里奚何如人哉吾嘗按
其行事所謂虞不用百里奚而亡秦穆公用之而霸者
也當其時虞蓋有兩人焉一曰宮之奇一曰百里奚然

奚之年長于奇奚之智亦過奇遠甚何也晉欲伐虢以
壁馬假道于虞其時奚已七十見宮之奇諫不聽遂不
諫而去之奚既去而虞亦亡矣嗚呼使虞公而可諫諫
而虞可不亡奚與奇俱以虞人老彼食牛干秦穆公之
汙何自而加哉然吾有以知其必不為正在於此夫百
里奚虞人也能以秦顯而不救虞之亡豈忠於虞不若
宮之奇哉且宮之奇以其族行其後遂無所見而奚功
業卓卓如是蓋其知廢知興之智既已見于去就之明

而顯今傳後之賢尤足驗其挾持之素然則自驚之污將謂其不知而為之耶將謂其知之而且為之耶方其不諫假道之時其品與識固已大定矣好事者之云多見其不自好也

下節覲縷俱於敘上節時消納已盡故入下節後筆墨分外閒淨筆之古峭不待言

原評

